

FJALA E DEPUTETES ALBANA VOKSHI

E ENJTE 30 QERSHOR 2022

Zonja Kryetare, në fakt, zonja ministre, për t'u mbrojtur foli për atë çka ndodhi dje në seancën gjyqësore dhe nuk foli fare për aktin normativ abuziv dhe korruptiv që po sjell qeveria sot. Unë u mbetem deklaratave që kam bërë, i mbetem statusit që kam shkruar. Dje u paraqita vetë për të dhënë provat, jo vetëm për ato që kam shkruar, të cilat më kanë ardhur nga mësues të qarkut të Elbasanit, jo rastësisht, por edhe për emërimet e tjera në Ministrinë e Jashtme, që bëhen jo rastësisht nga qarku i Elbasanit, mbase edhe me ndërhyrjen tuaj direkte, edhe kur janë të dhëna sensitive të sigurisë kombëtare, por ju refuzuat të paraqiteshit.

Unë do të jem në datën 14 korrik, në orën 12:00, nëse nuk gaboj. Koha ka provuar se pyetjet e dërguara në inbox-in tim nga mësueset e qarkut tuaj ishin ato që ranë në provim. Kjo tregon degradimin e sistemit arsimor. Kush e ka fajin për këtë? Fajin e keni ju, zonja Ministre, që arsimi ka degraduar në këtë pikë, në pikën më të ulët të historisë së tij. Ju keni përgjegjësi ligjore dhe morale për atë çfarë i keni bërë arsimit. Ju keni përgjegjësi morale dhe, nëse ju ka mbetur sado pak, duhet të jepni dorëheqjen në të njëjtën ditë që ju keni shkatërruar maturën shtetërore dhe arsimin.

E fundit, shikoni këtë tabelë të INSTAT-it, 208 000 nxënës dhe studentë janë larguar nga sistemi arsimor. Kush mban përgjegjësi për këtë? 1 në 3,7 nxënës dhe student është larguar gjatë qeverisjes suaj, kush mban përgjegjësi për këtë? Kush mban përgjegjësi që arsimi është kthyer në celulë të Partisë Socialiste? Ju dhe Edi Rama duhet të mbani. Ju duhet të kishit dhënë dorëheqjen. Nëse nuk e jepni dorëheqjen, Kryeministri duhet t'ju shkarkojë menjëherë.